



15. november 2022

UKA 2022/46

Tunup namminerisamik Kommuninngorsinnaanerata nalilernissaa pillugu apeqquteqaat aallaavigalugu oqallisissiaq

(Inatsisartunut ilaasortaq Lars Poulsen Siumut)

Siullermik Inatsisartunut ilaasortaq Lars Poulsen Siumut apeqquteqaat aallaavigalugu oqallisissiatut siunnersuutaanut qutsavigaarput imatullu oqaaseqaateqassalluta.

Kommunerujussuit pilersinneqarnerata kingorna sutigut tamatigut innuttaasut qanimut oqartussaaqataanerup innarlerneqarsimanera pillugu oqariartuuteqartuarterat ilisimaaraarput, tassungalu tunngatillugu Siumut ersarissumik politikikkut anguniagaani allassimasoqarpoq innuttaasut kissaataat ersarippat aammalu tunngavissaasumik takutitsippat pisussaaffigipput kissaataasup piviusunnagortinneqarnissaa pillugu suliniutit assigiinngitsut ingerlanneqarsinnaanerata ammaffiguarippat, kiisalu siunnerfiit ataatsimoorfiuppata tamatumap pimoorullugu sulissutigineqarnissaanut partiitsinni ammaffigiuarnissaa pingaartikkatsigu ersarissaajuarternissarput tamattumunnga tunngatillugu naatsorsuutigineqartuassammat ersarisaatigiumavara.

Kommunerujussuit pilersinneqarnerisa kingorna ilisimaneqartutuut nikeriartoqarnikuuvoq. Qaasuitsup kommunia avinneqarpoq suliallu ingerlasimanera annerusumik tikissanngilara, taanna pillugu ilisimasat annertuut siammasissumik pigineqareermata.

Siunnersuuteqartup tunngavilersuutai ersarissut aatsaat tusalinngilavut, ilisimavarpummi pingaartumik tunumi innuttaasut piffissap ingerlanerani pikialaartuarterat qulequtaq pineqartoq pillugu, aammalu taamatut qisuariaateqarterneq piosoq naatsorsuutigilluinnaratsigu pissusiviusunik tunngaveqartumik iliuusaasuusut, taamatullu tunngavilersuuteqarnerat ulluinnarni atukkat ilisimasatik aallaavigalugit pisarmata, tamanna paasisinnaalluarlugu taasinnaagatsigu.

Misilittakkat naapertorlugit Qaasuitsup Kommuniata avinneqarnissaa pillugu oqallinnermi aalajangiunneqarpoq innuttaasut tusarniaaffigalugit taasisinneqassasut, taasinerullu tikkuussinera tusaallugu suleriarterit tulluuttut pisimapput, taamaasillunilu innuttaasut peqataatilluinnarlugit Kommune avinneqarsimalluni. Taamatut suleriuseqarneq iluatsittut taarusupparput periusissatullu atorluarneqarsinnaasutut innersuukkusullutigu.

Naalackersuisut akissutaanni ersarippoq Kommune avinneqassappat aningaasaqarnikkut unamminarnerusumik inissittoqassasoq oqaatigimmassuk, kiisalu pingaartumik atorfinitsitsisarnissat pillugit unammillernartumut inisseratarsinnaaneq piulissasoq



siulittuutigineqarmat, kiisalu Kommuneqarfik Sermersooq tassaasariaqartoq saaffiginnissuteqartussa q taammasuk, tunngaviatigut isumaqatigalutigu oqariartuutigaarput.

Siumumit kissaatiguarparput qanimut oqartussaaqataanerup nukittuumik sumi najugaqarneq apeqqutaatinnagu innuttaasunit tamanit misigisimajuarnissaa, tamanna qitiulluinnartutut inissimasariaqartoq matumuuna naqissusissavarput, siunnersuuteqartummi naggataagut allassimasai Kiffaanngissuseq, qanimut oqartussaaqataaneq, tamat oqartussaaqataanerat pillugu taasai takutitsipput suliasaqartoqartoq innuttaasut taamatut misigisimalersimanerat pillugu.

Nalunngilarput kommunerujussuarput allanut sanilliullugu Kommune pineqartoq isorartoorujussuusoq, tassami sermersuaq qarsullugu nuna tikitassaq ungasseqisoq uani pineqarpoq, tupinnanngitsumillu isorartussutsip aqqani innuttaasut ujariatitsipput ungasissutsip ilaatigut pilersissimasaanik tunngaveqartumik.

Naggataagut oqariartuutigissuarput innuttaasut isumaasa paaseqqissaarnissaat pingaaruteqartutut isigigatsigu, kiisalu innuttaasut atugaasa minnerunngitsumillu ineriartortitsinerup aqqani qanoq nikeriartoqarsinnaanera pillugu paasissutissiissuteqartoqarluni suliniarnerit ingerlassasut naatsorsuutigigatsigu, tassa innuttaasut isumaat tusaaniarneqartariaqarpoq tassangaanniillu siunnerfik pigineqalersussaq aallaavigalugu suliniarnerit ingerlaqqissasut kissaatigalutigu, tunngaviatigut siunnersuuteqartoq taperserparput. Suleriaqqinnissamilu innuttaasunik qanimut peqataatitsinissaq atukkallu isiginiarneqarnissaat kissaatigalutigu oqaatigissuarput, tassa Kommunerojussuit pilersinneqarsimanerat oqallisaajuartussaasoq piujuartussaavoq. Uatsinnullu soqutiginarluinnartuuvoq sapinngisamik pitsaasumik assigiinnerusumillu innuttaasut sullinneqassasut atugaqassasullu kissaatigigatsigu, tamannalu qitiusutut inissisimalluinnassasoq oqaatigerusussuarput.

Taamatut oqaaseqarluta oqallisissiaq tunngaviatigut taperserparput.

Jens Kristian Therkelsen, Siumut